

陝西 省

續興安府志

中國方志叢書·華北地方·第二九三號

據

清·葉世倬纂修
清·嘉慶十七年刊本

影印

陝西 省

續興安府志

(全)

成文出版社有限公司印行

續興安府志

興安府知府王

板存來
鹿堂

續興安府志序

歐陽公見學者多談吏事以爲文章止于潤身政事可以及物余深有味乎其言嘉慶甲子乙丑間余應中丞方公之聘友教青門所接貴游不少嘗得經畧印文一紙因思集元年以來新設文武官吏印文各題以詩裝潢成帙以紀內外大臣經國之識

聖朝除戎不虞之戒丙寅八月寧陝賊起余倉皇歸里霜露夜行得寒疾次年秋九月辭中丞而歸集印之舉不果每檢書見經畧大臣印文未嘗不追念前志也興安太守葉公健菴曩嘗薦震川于溫方伯又薦震川于方中丞者也交親氣概實爲知己震川病歸之日卽公興安蒞任之時

公講學論文皆使學者由本及末毋捩我華不食我實論
政事如古之善說史漢者靡靡可聽其施於民也務惻隱
之實不徒飾文具然敬教勸學修廢舉墜又未嘗不以經
術飾吏治治興安四年政和民安人嗟來暮而有續府志
之舉書凡八卷安康老友董樸園先生耆德碩學著書滿
家公嘗造門咨訪吾友亦辭讓而對不惜傾囊倒篋是書
體例一遵前志惟昭忠一篇前志未有固增乎其不得
增義烈一篇小變舊例亦變乎其所不得不變補遺訂訛
一卷所關輕重不同卓犖觀者要未可一端或遺也公嘗
寄余數金屬購蠶種意甚懇摯旣得種付所賞郭孝子董
其事而郡中桑猶可覓未有深解三眠三起停葉駐食之

法者蠶桑須知雖刻印頒示民尙未獲絹繒之利震川深爲公惜之幸他政絕不類此多有功緒可稽而公之歆然不自慊則不僅蠶政之寡效已也然明之心余於此益見而公今膺卓薦恐將擁蓋去此作監郡使者吾不知郡人去後之思當何如也然則是續也豈僅文字之傳與武功耀州朝邑高陵諸志比精覈高妙已耶

嘉慶十七年壬申修禊日治愚弟灋城岳震川拜撰

續興安府志叙

興安府志修於乾隆戊申巳在由州改府之後
歷年未久續志之舉似非爲政者先務然興郡
負山濱江爲四塞奧區自嘉慶元年白蓮教匪
倡亂以來常依爲逋逃藪遭蹂躪者九載其間
陣亡官兵鄉勇以及臨難捐軀之士民婦女所
在多有又原志所載建置食貨職官諸門繼因
便俗宜民亦多更易皆不可以無傳余於十二

年冬來守茲土計凱撤甫三四年而稽之故籍
詢之耆舊已多散失無徵況其後耶孝廉董樸
園先生與余爲甲午同年友漢南文獻也舊撰
有讀志勝說一書分刊誤訂訛補遺增封建兵
防外志凡五門余因就咨訪並屬爲續纂體例
一遵原志惟增昭忠節烈兩門缺者補之訛者
正之凡八卷閱期年而成後有作者庶幾彙而
輯之得成完書已乎雖然余尤重有慮焉考前

明州志始於成化戊戌知州鄭福繼之者爲嘉
靖丁亥鄭琦萬歷乙未胡天秩又丁巳許爾忠
數君子者蓋屢經考訂矣至

國朝康熙丁酉王希舜重修以武進高仲偕先生癸

亥所修州志爲藍本按高志云康熙庚寅歲到
州得見舊志刻本後壬寅復來求刻本不得止
得抄本此卽高志所依據者今不惟舊本不可
得並高志亦僅見於樸園同年家良可慨也蓋

興安山深地瘠民多流移而又降楚蜀濱漢水
歷觀往事不數十年間而或遭兵燹或浸洪波
百姓流離遷播故世家大族抱殘守缺者恒鮮
其人官斯土者思弭禍患于未形休養生息而
饜飫之宜遵何道耶

世倬

官于茲四年早作夜

思求所以善其後而才短政拙迂疎寡效竊深
愧沮因以頻年所蒐獲者彙爲此編以備後來
考鏡藉補余過此實續志之旨非敢漫災梨棗

也

嘉慶十又七年壬申三月望日興安府知府上
元葉世倬書于玉屏山館

舊序

州志舊叙一

明成化戊戌九月
望日白河縣知縣普暉

夫有道者不爲無益害有益而所爲無不爲道也蓋有所試矣有若金州統五邑曰洵陽曰平利曰漢陰曰石泉舊領也惟白河爲新開舊志俱落莫不悉無乃道典有缺與郡守深州鄭公福首爲此慮以政事繁劇不逮索暉集竟乃序曰志何爲而作也爲志其形而下者也夫志其形而下者其山川城池物產貢賦與其公署廟學池亭橋梁寺觀井泉與抑其溪澗道里鋪舍人物名宦詩文邪蓋兼有之則形而上者亦在是矣何者蓋山川城池道之流峙樊衛也廟學公署道之模範觀瞻也寺觀道之虛寂也池亭

道之遊觀也井泉道之源也溪澗道之流也物產貢賦道之生需也橋梁道里鋪舍人物名宦詩文道之攸寓也道其形而上者而妙乎形而下者與夫顯微無間尙矣志載形而下者則形而上者不在是而安在邪然則是志爲無益者乎雖然守篤志於道者暉瞽行冥趨而索道塗者其於是惡能有益而副守託耶直據此以爲有道者俟

州志舊序二

明嘉靖丁亥三月鄭琦
旣望知州建業

夫先知天下之事而後可以處天下之事况爲守令者不知一郡一邑之事何以言治哉嘉靖甲申予始至金州其疆域之遠邇土地之肥磽風俗之淳漓生民之休戚賦役之重輕與夫古今人物建置沿革舉無所知訪之舊志僉

曰版籍殘缺明年得成化間先守鄭君福刊本因知金州國初下邑四成化時增置白河而紫陽設於正德庚午里亦四成化時增爲十七弘治末增爲二十五未幾析三里於紫陽今實二十二以今視昔不無有缺又明年見風土貢賦人物之日盛藩臬守令設施之繼舉較鄭君時大不侔矣琦忝州牧不續志之可乎爰采衆識付庠生王定之彙次成編夫志以紀載因類附增至田畝惟以起科紀著因土作貢之制也屯田不以軍政畧示兵出於農之法也錄戶口見繁庶現有可徵載徭役見財力不宜盡取表和公王氏之行顯忠節也籍步畝間架之稅備稽考也孝義雖無猶題其目望後人也社倉雖廢猶詳其事存義舉也

以今之有補昔之無以今之詳該昔之畧而志庶幾成矣
自茲以還疆域之遠邇知所以保障之土地之肥磽知所
以勸課之風俗之淳漓知所以激昂之戶口貢賦人物建
置知所以安養法守之豈直爲文具而已哉雖然時勢有
隆替風土有變遷習尙有美惡政教有張弛安知今日之
所有不爲後日之所無後日之所增不爲今日之所缺乎
是有望於後之守茲土者

州志舊序三

明萬曆乙未夏四月朔知州東牟

胡天秩

夫郡邑有志其來尙矣興安在陝東南舊有志癸未漢水
之變典籍蕩然則志不可缺亦不可緩矧甲申改金爲興
安郡且異名志何可仍舊余奉命涖州甫兩月例當入觀

及旋博訪羣籍商同學正董際訓導袁尚紀周魯採舊志
詢耆獻刪繁就簡釐而序片而類今生員李進芳楊以樽
校讐之夫志者一方之實錄也自嘉靖丁亥鄭守琦修刻
抵今未六紀其土田形勝不減也戶口貢賦尤過也而風
俗遠不及嘉靖之世豈真江河之趨不可返乎蓋嘉靖時
其民淳則安於無事故財力培而長厚之道崇今囊橐付
之河伯矣血力委之土木矣民苦荒歉奔波亡命始競僥
巧以偷生閃避與嘉靖不相及非真民心之過財匱力竭
勢不得不然耳雖然顧上之所處何如耳吾以勤率俾民
力於耕作吾以儉率俾民甘於節省需之歲月民心雖愚
必有向風挽轍可回氣運於萬一云

州志舊序四

明萬曆四十五年
七月十五日知州許儼志

與之有志創自鄭州守福時則其民淳其俗樸閱四紀鄭
州守琦復有增補時則其民衍其俗裕再四紀有八載陽
侯肆虐城市爲沼改治更名固窮則變之時也又十載胡
州守天秩重修時則其民瘠其俗漓緣漂流之餘瘡痍未
瘳時勢然也丙申直隸於省免奔供之繁埒八郡而九休
養生息二十餘年又變則通之時也而瘠也漓也日甚豈
流風逝波不可返耶亦水旱頻仍勞來安集未盡其道耶
忠始至於境觀披繆帶塹廣輪千里比卽事百廢蝟集環
矚蒿日思於百姓更始惟無以道體解因取州志閱之庶
幾得其肯綮而舊事不載新事且缺嗟嗟以州之不知何